



Jürg Kappeler (san.), Agnes Brandenburger, Lukas Horrer ed il president da Verda Angelo Andina han surdà a Walter Frizzoni (entamez) las 4137 vuschs ramassadas.

FOTO FANDRY

«Per elecziuns gistas»

Comitè grischun ha inoltrà iniziativa per il proporz 2014

■ (anr/fa) Il comitè „Iniziativa dal proporz 2014“ ha lantschà quest onn l’iniziativa dal pievel chantunala «Per elecziuns gistas». Els han dovrà tschintg mais per ramassar las 4000 vuschs necessarias. La procedura electorala per il cussegl grond è dispitavla dapi decennis. Sin fundament dals midaments socials e politics vesa era la regenza grischuna in basegn da reformar il sistem electorala. Quai duess ir «en direzziun d’ina procedura electorala da proporz», aveva scrit la regenza d’atun 2010 en la missiva davart l’iniziativa da proporz da la pps. Ensem cun in expert da l’università da Turitg era la regenza dentant vegnida a la conclusiun che l’iniziativa dal pps avess violà l’egualità d’eleger, sco pretendi en la constituiun federala. Perquai ha declarà il parlament grischun cun 109:4 vuschs l’iniziativa da proporz dal pps sco nunvalavla. Il comitè «Iniziativa dal proporz 2014» cun commembers da pliras partidas, p.ex. pps, ps, verliberals, Verda, la

partida evangelica svizra evp, l’Uniun democratica federala edu e personas privatas ha lantschà ils 24 marz ina nova iniziativa nomnada «Per elecziuns gistas». Venderdi han els inoltrà a *Walter Frizzoni* da la chanzlia chantunala a Cuira l’iniziativa sutscritta da bundant 4000 votantas e votants grischuns.

«Independentamain da la reforma territoriala»

Ils deputads al cussegl grond *Agnes Brandenburger* (pps, Tschintg Vitgs) e *Jürg Kappeler* (verdliberals, Cuira) ed il president dals Giuvens socialistes *Lukas Horrer* han argumentà pertge ch’i saja a lur avis da sustegnair quest’iniziativa. Ch’igl è gartegià en mo tschintg mais da ramassar 4137 sutscripziuns mussa tenor Brandenburger ch’il proporz saja propi in basegn en Grischun. «Perquai sto l’iniziativa vegnir prendida per mauns subit ed independentamain a la reforma territoriala ch’ins è londervi ad elavurar», ha ella puntuà. Kappeler ha

dà in sguard en l’istorgia e menziunà ch’il tema «elecziuns gistas» vegniva discuss e pratigà gia en l’antica ad Athen. «Il sistem electorala actual en Grischun però privilegiascha ils ‘gronds’ e dischavantagescha ils ‘pitschens’», ha’l ditg, «ina dretga democrazia dentant respectescha las minoritads e las participescha a las decisziuns.» Ch’els sajan persvas che la populaziun en Grischun veglia ch’il cussegl grond vegnia eligi da l’onn 2014 per l’emprima giada cun il sistem dal proporz, ha’l concludì. «Noss’iniziativa garantescha ch’era il parlament grischun vegnia elegi a partir dal 2014 da maniera confurma a la constituiun federala e ch’è tuttina cumpatibla cun la reforma territoriala en elavuraziun», ha ditg Horrer, «sco circuls electorals duain ins prender ils districts ch’èn a medem temp er circuls da dretgira.» El ha menziunà era la vista da la giuventetgna: «Il proporz è ina schanza per ils giuvenils da sa participar a la politica.»